



白沙集
二

詩

^ 16
2329
2

廿
十
五



和
2329
卷之八

白沙先生集卷之三目錄



詩

庚子以都體察使兼都元帥視師南方路過庇

仁縣冒雨登冬栢亭

冬栢亭放歌成詩

夢小兒

題姜從事待月堂

對雨偶吟

雨後巡邊

鯨島閱兵

靈巖途中

四月初二日霜降

是歲五月承命還朝午憇溫陽郡

懿仁王后挽詞

亂後十年長在鞍馬庚子除夕偶得在家悄悄

守歲書示井男

呈告乞解申敬叔欽貽書起之書示

應製次陳都督璘韻書扇寄贈

書申叅判叔正湜兄弟慶壽宴帖

送朴叅判應邵朝天

送李德川希幹

久病迎醫因戲占口號

重陽口占

隣有少年勤來問字書示

春日偶訪讀書堂舊基

讀書

八月二十五日夢與亡兄尋春南岳

子龍次韻見示仍次却寄

晝夢甚繁欠伸一覺室中間靜蕭然清坐了無

一事

題錄勳都監宴會圖

偶吟

曉起

亡友發刺都門有感

自悔

謾書

讀黃庭經偶書

睡起口號

偶吟

閣夜

偶吟

李侖知壽俊挽

西厓柳公成龍挽

宣宗大王挽詞三首

李兵使賞挽

咏庭鴈

題楓溪小閣

題閔漬巖

題林家亭

寄李聖徵廷龜

完山府院君李公軸挽

寄順生

題柳尚書別墅

答奎男書

偶吟二首

雨霽

漾碧亭八詠

韓議政應寅挽

十月七日自靈山江亭移寓蘆原室廬荒涼因

憶舊居有感

偶出瀑布還聞金景擇來訪不遇

訪梅月堂

答李上舍願男

禮曹南主事以上命來問戊戌辨誣時事感

而有作

過河原君墓有感

雪後

州人敲門傳致黃柑十枚云內賜也感而有

作

鄭景任經世貽書相問

聖旨有所咨詢金吾即馳至時余方埃罪蘆原
時議洶洶渾舍驚懼

漢陰李公德馨挽

漢陰挽 不用

即事

蘆原寓舍無井常飲小礮余鑿井得水喜而有

作

偶吟

隣人設漁邀余觀之

松橋翫月

雨後觀上界瀑布

金冠玉 塗見訪

次李盈德惠西瓜有詩

官妓三春自全州攜琴來訪

宿道峯書院三絕

雨中

述懷

懸燈寺

加平郡虎巖洞

重陽出坐溪上因說京家砌上猶有舊黃菊感

而成詩

讀皇極經世書

偶成

秋日遊道峯山

秋日

初在東江靈山君有同老之約及來蘆原李僉
知俞監司相繼來訪俱有杖屨朝夕之言不
日靈山買宅入城僉知亦入城造家俞公亦
出按海西余獨趨起湘中戲成一絕

題壁二首

梧老數使人相問不用簡牘而用口語詩以戲
之

梧老次韻又次却寄 三首

嶺伯張好古 晚病甚書來有永訣語夜起彷徨
甲寅除夕夜坐口占

夢朝 慶運宮

聞梧里謫洪川

踏青日有感

春日出遊

甘泉驛戲占一絕

入春川府

寄宿村家頗靜寂可愛

過超然臺

入清平寺聞有豈師坐禪見性庵

春川士李安崔三君子聞余遊清平為來相訪

離坐盤石欲移家儼居以送餘年

登鳳凰臺

還途入龍門山

卜築無任江上野濶江低居不見水戲題

聞 祔廟禮罷街衢獻謠都人擁觀儀物甚盛

星男陷在逆獄父無獨生之理待 命東門外

凡十九日而事得釋即日還山途中悲吟辭

無倫序 三首

偶題盤石

夜坐有感

寄題退憂亭

舊歲將盡李盈德寄詩相問次韻却寄

盈德再用前韻演成兩句又次以謝

洪大司憲履祥挽

送人朝京

效擊壤體

戲作三四五七言

哀崔海州 沂。二首

東岡屋成喜題

歸途登峩嗟嶺望見漢陽悵然賦此

重九偶遊寧國書院無酒無朋行囊唯乾栗建

茶嚼栗煮茶以慰飢甚是寥落

盲卜來言余厄年問可度否當用幾貨則曰用

黃梁一斗麻布數尺足矣不覺捧腹戲題

客有來問聞具疏將上乞賜一見答云何疏曰

京師多言近當有昭臺宮事鰲老具疏將上
答曰我以兩賢疏語侵時相至今為奇禍今
不在位事無大小理無與知何有是歟因戲
為詩

鄭景任在獄一年忽有 恩命携家南歸途中
見訪

聞韓益之 浚讌 申敬叔皆將遠竄

敬叔將赴謫所貽書乞詩

順生娶妻戲成一絕

春日過南子安舊居

送李尚古聘日本

寄申敬叔

八月初九日中風戲成三絕

讀史有感

朝起望見雲吉峯戲占

生日聚族小酌

臘月二十二日有昌城之命初過忘憂嶺是

日甚寒

是日待命于青坡村再疊前韻

到青坡移配慶源又移三水正月九日改北青

李延陵好閑諸君携壺送于山壇道左

往心里瞻望都城有感

道上戲吟短語

早發金城縣抱川諸姪等辭歸

始有三水之命命改北青路踰鐵嶺喜而有

作

不寐

二十一日宿安邊民家女友夜起啼甚悲云夢

見權姊問道何事曰無一語遂悲惋成詩

口號

德山驛

咸原驛

士人尹善道抗疏言事因竄六鎮道過洪原官
妓趙生佩壺來慰以此名聞洛下今適過此
寄宿其家不知主人為趙也翌日乃知戲吟
一絕

二月初六日到北青

夜坐

北俗喜馳馬男女皆羶笠執鞚而馳時有官妓
慶仙來見余余問汝亦能是乎仙即據鞍回

旋躍馬而走余喜而賦之

端午思先墓

白沙先生集卷之三

詩

庚子以都體察使兼都元帥視師南方路過庇
仁縣冒雨登冬栢亭

轉眄身如駕赤鱗腥雲送雨濕旌麾鎗竿可化為長
筴淨掃重陰豁四維

冬栢亭放歌成詩

巨海不盈眼奮身凌萬波周觀天外界佳處卽為家
夢小兒

去國一身危懷歸雙鬢絲小兒啼入夢 玉事杳難

期

題姜從事待月堂

小築當東崦晴秋待月宜海涵靈氣發山吐瑞光奇
縞魄看看滿長風陣陣吹清輝難贈遠遙夜只心知

對雨偶吟

衙罷仍憑几清談到夕曛庭花受微雨岸樹入重雲
過眼年遲暮當前事糾紛征西多佐吏深愧庾將軍
雨後巡邊

雨後旌旗媚夕陽萬條楊柳拂陂塘慚吾宦迹偏榮
達四十元戎鬢未蒼

鯨島閱兵

紅旆翻飛颺晚春千艘銜尾列句陳指揮合變星辰
動舸艦旌旗氣像新帳擁戈鋌嚴虎旅陣成雲鳥次
魚鱗男兒壯歲非寥落鄧禹何心敢笑人

靈巖途中

昏昏走世未安足忽忽對山多厚顏北望殷憂不可
攬南來疵政詎能刪浮榮如酒醉千日好鳥弄人鳴
百般事與心違十八九時危深覺丈夫難

四月初二日霜降

人事天時孰主張征途搔盡鬢滄浪
君王欲識蒼

生事四月光州有隕霜

是歲五月承命還朝午憇温陽郡

雙鷺翻飛水滿塘荷花深處柳陰涼溪西遠響風和
雨裸卧官齋睡味長

懿仁王后挽詞

伊昔仁和夜蒼黃鳥擇棲蘭階燈影少繡幕雨聲淒
獨秉金蓮照親扶 玉輅西再三 天語慰咫尺寸
心迷運復千春慶灾生萬姓啼嗚 恩兼仰 德詞

拙若為題

壬辰之變忠州敗報至一時散歸西廵之教
百官皆歸私第衛士一車駕已備而
落如空宮及曉天陰雨下殿獨與侍女十餘人步出
仁和門外聞無人蹤

仁和門時余以都承旨秉燭待門外前導以出內
殿顧問秉燭者何官侍女白都承旨李某 內殿咨
嗟慰諭勉以
忠義故及之

亂後十年長在鞍馬庚子除夕偶得在家悄悄
守歲書示井男

可憐今夜坐無寐吾與二郎俱長年少子勉哉豹一
變老夫耄矣蠶三眠風塵奔走猶紛若骨肉團圓亦
偶然傳語隣鷄莫催曉九分春雪到頭邊

呈告乞解申敬叔 欽貽書起之書示

中興作者足謀謨老子何堪 聖世需自識孔君元
齟齬誰言呂相不糊塗時名短拙關心少身計差池

入手殊却笑晉家王太尉白頭猶道宦情無

應製次陳提督璘韻書扇寄贈先生嘗侍廟接陳提督璘

陳出一律且以扇要上酬和上教曰提督使予次韻予不可為領相能文章筆札又好親製書入予當以此意揭帖以送即於幄前立草以進

高牙大旆鎮東州日域飛氛萬里收喜氣直隨江漢轉威聲遠壓海雲浮來時鴨水人愁喝歸路遼河雪滿裘深愧贈行無長物離情唯有酒盈甌

書申叅判叔正湜兄弟慶壽宴帖

大郎腰間金帶長小郎鬢上玉環光扶將鶴髮左右舞舞獻慶壽齊陵岡阿翁八十健如牛尚能百拜新

恩優蒼顏黃耆聯翩來金屏列坐神仙儔同聲齊唱百千壽此樂如今世更有人稱崇福五能全世有達尊三并取翁言老身此何堪瑟縮幾欲循墻走仍呼二妙前致辭嗟我兒曹戒終咎婁門盛德本恭謹石家萬石由忠厚手摩口授更繾綣兒爾無忘乃父願風流話本落人間片言終成一家訓鋪張勝事屬老夫老夫身世堪嗚呼題詩撫已一潜然夕陽風樹啼慈烏

送朴叅判應邵朝天

看君臘月去朝京憶我曾遊望海亭北漠窮陰吹

大壑晴天飛電灑長城

送李德川希幹

西路疲人因未蘓君今起廢首分符寒聲慎水青
琬轉秀色香峯畫障紆逸網慙磨投小院窘鷹文雉落
行厨春眠喚覺官童語階引山氓課掘芋

久病迎醫因戲占口號

壬寅春被清州儒
疏斥呈告因臥病

人言醫病如醫國我以函人矢人比今年負謗仍抱
病時宰欲殺醫欲已固知人性本同天却愧擇術胡
乃爾耕田欲雨刈欲晴造物無心焉彼此且任吾生
耕刈間一聽天公無意意

重陽口占

虛庭負手履新霜秋葉號風感歎長黃菊且須開爛
漫老人能閱幾重陽

其二

九日如寒食空齋坐柱頤黃花與白髮相對不相宜
隣有少年勤來問字書示

詩書糟粕豈精神芻狗區區愧已陳載酒未須頻問
字近來輕薄喜窺人

春日偶訪讀書堂舊基

碎礫遺墟問劫塵玄都猶憶種桃春樓前獨樹依然

在能記當時倚檻人

讀書

百年苦易滿微陽難再中志士晚知悔詩書初擊蒙
勿憂日力短且使志有終博學貴多蓄蓄極斯乃通
通而至於神神處方成功茲言倘不信請質於遜翁
八月二十五日夢與亡兄尋春南岳摘艾為湯
陽浮草際生意已動從城外林下遙見春江已
綠漲矣怡愉相譔宛若平日覺而悽黯注心玄
空僂然其容若將見焉因灑涕以記

陽岡春暖草抽芽林表晴江霽色多勝賞至今時入

夢十年零落舊荆花

子龍次韻見示仍次却寄

雪下陳根艾欲芽香羹小會得春多吾家兄弟當時
樂夢裏分明感棟花

晝夢甚繁欠伸一覺室中間靜蕭然清坐了無
一事

醒來蝴蝶已亡羊妄想遽然墮渺茫遲日小園春爛
熟暖風深院絮顛狂間教小女輕搔背懶愛晴窓靜
負陽身似老牛鞭不動任他鷄鴨鬪昇堂

題錄勳都監宴會圖

珍甘 恩賜下凌烟法府笙歌會衆仙誰識漢庭蕭
相國愧將文墨誤居先

偶吟

理本吾身不昧靈豈須探索向冥冥此心妙運人兼
道前聖微言一與精剝去攷如塵翳鏡歸來真是耳
司聽間尋蠹簡成悵憤獨對新晴倚草亭

其二

萬類芸芸我最靈靈源胡乃久昏冥休嗟白髮如絲
白要在精思似鍊精寒水月明唯獨玩瑤琴絃絕與
誰聽安車整轡多蹊迳此路無由問考亭

曉起

風雨踈櫺曙色遲獨鳴天鼓灌華池靈臺一點清如
許此味人間未易知

亡友發引都門有感

曉色蒼涼草樹哀都門哭送故人埋親朋咋指勤相
戒命覆深尊太白盃

自悔

少年言笑太非情錯料幾虛過半生晚矣瑞庵間老
釋夜深初喚主人醒

漫書

是身於世猶箴屐晴則深藏雨則行幸際太平無事
日小窓終夕看遺經

讀黃庭經偶書

淨室游塵汎隙曛紙窓香篆度微雲南簷短日踈踈
下讀盡黃庭內景文

睡起口號

池亭終日岸綸巾隱几沈眠起欠伸一枕午風涼似
水若為持贈夏畦人

偶吟

便便瞞腹坐垂溫泯泯忘言內自存萬里春陰環境

落一輪晴月照乾坤

閣夜

暗水泠泠瀉澗沙飛蟲遊夜柳烟斜墻頭月照半階
影魚在重淵時動荷

偶吟

月過寒塘影雲移小樹痕先天本無象欲語已忘言

李僉知壽俊挽

世日趨澆偽唯君老益真風流今杜保氣槩舊希文
書報乘槎信人亡返國春逢迎只旅櫬危涕滿停雲

西厓柳公成龍挽

白少集卷之三
此道久淪沒斯人今又亡精神傳簡策糠粃鑄虞唐
得喪身何與行違事益章無由覩玉立黃閣日荒涼

宣宗大王挽詞三首 戊申

濬哲文明德湯文舜禹行恭惟運中否必也聖重光
久信仁能壽深期業更昌乘雲厭世速謨烈為誰長

其二

襄野迷途厄雲中袒背誠龍歸晉淵舊恩紀漢臺榮
事已封留足心猶向日傾孤忠謝冥邈何路答昇平

其三

曙色都門道千官涕泗長北來龍虎地東葬 聖賢

王恨水松溪咽愁陰草洞荒行間有遺老淚盡默摧
傷

李兵使贊挽

寥落箕城將寘機卧十秋醉愁逢灞尉貧不賣吳鉤
大樹風蕭瑟雲臺事謬悠無人記黃壤列校盡封侯

咏庭鴈

在郊那似在家肥人笑冥鴻作計非莫把去留論得
失江南水濶網羅稀

其二

楚金無主壑舟移病裏湖山覺後疑試向東華看得

喪人間何事不如斯

題楓溪小閣

小築依西崦重巖野菊華泉聲落地細秋色入門多有客隨緣至無人勸酒歌留連忘日夕歸路已棲鴉

題閔漬巖

閔氏盤巖掌樣平石門西下細川清詞人已去獨遺跡潭洞無心留遠名晴日錦文青嶂纈秋天霜色白雲明詩成欲遣山靈和抱膝高吟衆壑鳴

已上壬辰亂後作

題林家亭

密樹擁陂陀孤亭露一角斜陽北牖明林表山依約

寄李聖微廷龜

瑣力誰令妄負山天恩晚許老江干行吟澤畔形枯槁却笑靈均意不寬

完山府院君李公軸挽

槐院曾聯席雲臺晚盍簪多君殊近古嘆我不宜今隔歲死生別忘年疇昔心東門孤執紼西望一長吟

寄順生

北溟雲翼化長魚萬里風程擊水初天外遠尋希有鳥別來棲息問何如

題柳尚書別墅

路困啜茗來主人無惡語一鍾井華清愧不投錢去
答奎男書

莫問平安否心安是上仙俯思仍仰讀無事擾閒眠
偶吟

得意投林鳥無心出岫雲江湖憂思少深愧范希文
其二

寄語蘆灘水憑添去國愁長安不可見日夜向西流
雨霽

雲吉山如畫沙灘水若油新晴秋七月政好汎舟遊
漾碧亭八詠

曉色蒼涼隱石屏迎陽忽作浮嵐翠須臾變滅山依
然一抹濃綠如新繡

右南漢朝雲
天畔離離紫翠堆回頭已失半邊赤高峯定有閒道
人日日無心點周易

右清溪夕照
江客爇松暗捕魚斜光閃閃水明閣不愁春漲沒蒿
深唯恐夜來風作惡

右沙灘漁火
蒼山中斷大江迴一幅蒲帆掛斜日賈客筭緡應不

間能使遙看新畫活

右渡迷風帆

遙舍炊烟膚寸興郊原混作浮天水橫吹蘆管倒騎
牛落日晚風如畫裏

右前郊牧笛

雪後陽岡多朽枝三兩腰鎌赤樵叟行歌相應不成
音未信人間有韶濩

右後山樵唱

青蓋童童遠不分鳩鳴遙在依微外烟中漁舍語星
星新水入扉魚上瀨

右東屯烟樹

西林一夜新霜重水風亂灑猩猩血輕霞映帶夕陽
明紅錦千純刺眼纈

右西崦霜林

韓議政應寅挽

谷口誰相問親朋入夢思當君復魄日改我怨離時
禮絕東園秘雲沉北望悲惟將寢門淚頭白灑湘纍
十月七日自靈山江亭移寓蘆原室廬荒涼因
憶舊居有感

矮屋依荒谷山寒葉擁門村無人賣酒夜有虎夔藩

去國親朋遠思江勝事繁王孫小松月誰與共金尊
偶出瀑布還聞金景擇來訪不遇

道隱來人少村荒好客稀還家有題鳳無語立斜暉

訪梅月堂

秀士東峯下談經有草亭隨緣濯纓去歸路暮山青

答李上舍願男

莫問平安否身閒病自痊無心亦無事真箇在家仙
禮曹南主事以上命來問戊戌辨誣時事感
而有作

倒屣迎堯問殊恩及野東人非周處士禮過魯哀

公草木含生意門閭剪舊蓬隣翁強解事勸使達民
恫

過河原君墓有感

水流東去日西飛富貴榮華能幾時試向河原墳上
望暮雲黃葉故離披

雪後

雪後山扉晚不開溪橋日午少人來篝爐伏火騰騰
煖芋栗如拳手自煨

州人敲門傳致黃柑十枚云內賜也感而有
作

南州包匭題封遠 御府分珍記放臣
擎出九門光照座傳來十顆齒生津
竒香帶露先凝鼻細霧含酸欲
喚人野老望天重拜賦憶曾懷
核近 楓宸

鄭景任經世貽書相問

退以耕於野歸歟舍則箴行裝九節杖契分一圭床
愍老虞翻棄憂讒屈子傷平生鄭景任書蹟問荒涼
聖旨有所咨詢金吾郎馳至時余方竝罪蘆原
時議洵洵渾舍驚懼

傳道緋衣使遙尋谷口迴虛疑後命至實有異恩
來驚定心猶折機深意未裁何能答 清問拜手只

心哀

漢陰李公德馨挽

淪落窮山舌欲捫吞聲暗哭漢原君
哀詞不敢分明語薄俗窺人喜造言

漢陰挽 不用

釋褐當年御李君陽春座上自生溫
初驚礪栢昂霄直竟見雲鵬掣海翻
歲暮北風寒栗列天陰籬雀恣喧煩
哀詞不敢分明語薄俗窺人喜造言

即事

放逐寄山礪偶與夙心諧水輕泉響清
谷邃禽聲哀

以茲悅心性遂乃居山扃鳥獸非所羣但欲長辭榮
所愧非幽貞迹與遐荒并身將雲共浮志與時相背
至人貴無迹何用捐余珮

己上癸丑年作

蘆原寓舍無井常飲小礶余鑿井得水喜而有

作甲寅

苦厭臨溪汲披榛得小山經營尋地脉疏鑿破天慳
帝力於何有吾生自在閒餘波纓可濯拄杖玩清寒

偶吟

寓舍劣容膝孤村敢避喧治生懶耕鑿信命委乾坤
俗議踈儒素人情忌大言明時老無事隨意負朝暄

隣人設漁邀余觀之

勝集垂晴日冠童類浴沂非無舞雩意不許俗人知
藉草依青岸磨刀割素鱸真成一飽樂牽興又觀碑

是日歸路塵拜趙四宰元紀墓

松橋翫月

恠禽鳴度夕烟空曲渚魚吹細浪風零露無聲滿身
濕不知身在碧霞中

其二

游氛已息靈籟靜橋上時時來水風童子驚呼說竒
事三山倒落空明中

其三

翩翩二老月明中橋下遊魚聞夜語試問明朝經過
人誰能識得真仙侶

是日李盈德
麟奇同遊

兩後觀上界瀑布

溪漲漱山來潛蛟能不怖領珠數萬斛暎日噴乾竇

金冠玉壘見訪

空谷有琴音踈籬狗出狴門外好客來厨中老妾窘
清談雜諧譎晚飯折蔬筍各言世味薄敢恨唐虞遠
學道竟何裨於世此為閨一則定自懲何用勞三獻
君來慰窮寂晚途驚深眷語罷出門別斜陽已西隕

次李盈德惠西瓜有詩

西天八個白獅子須識如來普濟心病喝無因蘇肺
氣園丁持惠當千金

官妓三春自全州携琴來訪

命駕輕千里携琴重一言能來成信宿彈作感君恩
宿道峯書院三絕

道峯霜色隱寒林深磴響空生薄陰石老苔荒人去
遠峩洋誰和絕絃琴

其二

朝廷未肯用虛名野外無田可耦耕進退即今難著

脚乞為留院老書生

其三

山中一夜笑聲和山外紛紛評語多今日吾儕幸無
事枕流堂裏一長歌

聖微同宿夜半
使其子歌之

雨中

終日簷床露脚垂薄雲籠樹雨如絲閒中未是都無
事養得新蕉過短籬

述懷

臣願封留足人言坐事輕寧無樹為屋不敢遠逃生
守固窮猶泰神安險亦平瑤琴絃久絕亦恐有繁聲

懸燈寺

雲岳山深洞懸燈寺始營遊人不道姓恠鳥自呼名
沸白天紳壯攢青地軸傾殷勤虎溪別西日晚山明

加平郡虎巖洞

石稜水有聲林密鳥忘形空谷和人語飢驢愁遠程
危松老絡石暗磳細鳴箏自笑尋山晚風塵誤半生
重陽出坐溪上因說京家砌上猶有舊黃菊感
而成詩

令節人誰問溪邊燕坐涼家園兩叢菊誰與作重陽
讀皇極經世書

每恨堯夫老多言強顯微伯温何似者枝上又生枝

偶成

薜服樓巖久冲虛近紫霞無營由分定有得覺天和
浥露餐朝菊歸林見暮鴉悠然成一趣樂處卽為歌

秋日遊道峯山

逕側孤槎擁溪迴小洞陰楓酣山氣富藤暗水聲深
得意時忘語懷人亦廢吟清流玩魚樂至理在無心

秋日

世事乘除異人情寵辱驚霜天道峯色突兀滿懷青
初在東江靈山君有同老之約及來蘆原李僉

知俞監司相繼來訪俱有杖屨朝夕之言不日

靈山買宅入城僉知亦入城造家俞公亦出按

海西余獨超超湘中戲成一絕

莫以蘭為恃京塵喜染衣山雲亦何事出岵去無歸

題壁

側逕徐行窘危機妙手難荒涼暮景色翫醜老容顏
晚計水雲外新功夷惠間間看後棲鳥猶得一枝安

其二

分過千灾集聲高衆目憎楚筵忘設醴唐將乞為僧
棲息依荒野扶搖笑大鵬南簷朝旭穩炙背對寒蠅

梧老數使人相問不用簡牘而用口語豈朝士
多以簡書遇害有所懲而泯迹之意耶詩以戲

之

李相公元
翼號梧里

口報平安信何無折簡辭時情喜窺密公意在三思
梧老次韻又次却寄

負國生無面歸田死有辭東城有遺老書迹慰幽思

其二

晚於書有味羞欲死無辭獨採幽蘭佩無由贈所思
其三

閒看少游傳喜讀歸來辭世事吾自料何勞爛熟思

嶺伯張好古晚病甚書來有永訣語夜起彷徨
嶺外傳書苦語多伴人燈火不成花思量朋輩凋零
盡見在如君詎幾何

甲寅除夕夜坐口占自念稟氣虛薄少多疾病
家貧祿仕志在米鹽虛名欺世致位卿相攝養
得效歷險到今六十之年倏焉已至皆始願所
未及凡物致極則危危而善持者鮮矣故建屋
不成三瓦忌盈也龜藏鷄伏以不動免凶咎今
既藏矣庶幾免夫古有所死得死者吾取以為
法乙卯正月一日書

為生迄可已六十亦云多寥落新居冷蒼茫暮景賒
全歸幸知免物極復何如時至聊乘化輿徒浩浩歌

夢朝 慶運宮

興仁三歲隔天涯谷裏孤吟似九歌春夢本來多妄
想鳳城鐘鼓踏晨衙

聞梧里謫洪川

不謂事如此云胡而至斯誰能竊斗柄獨自運天機
何苦生無奈寧將死不知仰瞻雲際日本自有晶暉
踏青日有感

家當京口小山隈每到佳辰感舊哀孤夢不知身落

拓戲隨蝴蝶踏青迴

其二

屋上阿斯達春來草滿坡遙憐三五伴歌笑趁芳華

春日出遊

芳郊氣暖惠風徐天朗衣輕體自舒縱蹇平原隨所
往杜鵑多處少踟躕

甘泉驛主人待之甚款平明登程主婦私語僕
夫曰且勿峻諱我知之吾子以驛卒慣陪老爺
因戲占一絕

夜宿甘泉村主人潛敬蹠華術如垢衣脫去留餘膩

入春川府

崖擁疑無路山開別有村
江通漢都貨地比嶺南暄
野曠稀逢虎民淳不閉門
昭陽臺上望襟帶似雄藩
寄宿村家頗靜寂可愛

小屋如蝸殼山深早掩門
懸燈坐靜夜別自一乾坤
過超然臺

沿崖雲棧細逶迤錦石清流影
陸離風自遠來江動色
孤帆一片舞文漪

入清平寺聞有訾師坐禪見性庵

芙蓉峯頂老禪師絕粒年年坐
忍飢莫把鈍根鑽鐵

壁往尋無價在塵泥

春川士李安崔三君子聞余遊清平為來相訪
離坐盤石欲移家儻居以送餘年

晚計昭陽下同君老一竿勿憂生事薄自有浮來山

州北有孤島號浮來山俗傳流
自狼川故土着貧而儻民富

登鳳凰臺

臺峻名虛設人傳鳥不知
簫韶今寂寞何日一來儀
還途入龍門山

寺古僧稀少臺傾樹老蒼
水聲喧下磻人語靜迴廊
北望羣山隔西歸一影涼
悲歌為何事悽斷不成章

卜築無任江上野闊江低居不見水戲題

澄江媚嫵青蕪隔見處何如隱處奇形勝世間誰得似綠羅帷帳匿西施

聞 祔廟禮罷街衢獻謠都人擁觀儀物甚盛

宗社初成 玉輦歸攔街爭奏鳳來儀梨園勿用新

翻曲更唱魴魚頰尾辭

星男陷在逆獄父無獨生之理待 命東門外

凡十九日而事得釋即日還山途中悲吟辭無

倫序

仰面乾坤大披襟日月明三山碧依舊霜色滿簾旌

其二

舊架凝塵靜新醪賀客頻因尋擊壤興長作祝堯民

其三

禍福緣有身無身禍孰因陶潛能解此乘化早歸真

偶題盤石

落景離離暎遠山東林風動草衣寒秋天杳杳雲空濶却羨歸鴉路不難

夜坐有感

人病不求爾求之則在斯何須瑞庵夜喚却主人知寄題退憂亭

笑爾希文甫多憂少樂時何如東野老憂樂兩忘之
舊歲將盡李盈德寄詩相問次韻却寄

錯料一生事不念年遲暮居然到六十攬鏡心獨苦
分甘甌生塵何嫌屋因樹世事爛熟思誓不再作誤
盈德再用前韻演成兩句又次以謝

浮榮違素心事業悲晚暮丘園存晚計不厭攻書苦
嚴霜忌幽蕙疾風摧獨樹漸覺獲新功庶欲改前誤
豪華非午橋貴勢異韋杜唯有灤西人時時吐奇句
洪大司憲履祥挽

衰年纔過六旬強舊友如今半在亡我偶得閒差慰

意君先去世益推腸東西分占江湖興風月俱為嘯
傲郎此事人間難并羨天憎雙鳥對翱翔

送人朝 京 丙辰

常幸朝 京在盛年壯遊時復夢依然赫連臺北山
連代徐達城西海接天文物尚餘周禮樂關防猶記
禹山川遙知祖席諸賢集憔悴江潭阻勝筵

效擊壤體

康濟吾生不要醫之中虛靜乃明師身無疾病為真
樂案有詩書是富貴南澗水聲喧鼓吹西窓睡興到
軒羲人間此事應稀少只恐兒郎取次知

戲作三四五七言

一張琴一架書山空谷靜隱端遙
虛微涼生樹杪細雨濕苔衣
歌眠夢入陶唐際簾角日長鶯亂飛

哀崔海州沂

白日在天朗孤臣在地幽
高明無不照此死更誰尤

其二

逆名寧有是顛妄乃其真
臣罪固當爾君王本聖神

東岡屋成喜題

早年為客落塵烟弄盡人間萬劫緣
頭白歸來江上

卧一天風月浩無邊

歸途登峩嵯嶺望見漢陽悵然賦此

西天暮色已蒼然淚入鄉山落日邊
嘯倚震巖遊遠目欣瞻華下萬家烟

重九偶遊寧國書院無酒無朋行囊唯乾栗
建茶嚼栗煮茶以慰飢甚是寥落

笑殺登高日翻成入礪來那將茶一椀
換得酒三盃盲卜來言余厄年問可度
否當用幾貨則曰用黃梁一斗麻布數尺足矣
不覺捧腹戲題

門外新年賣卜人多言時或中如神
可憐男子堂堂

命只直粗麻一布巾

客有來問聞具疏將上乞賜一見答云何疏曰
京師多言近當有昭臺宮事鰲老具疏將上答
曰我以兩賢疏語侵時相至今為奇禍今不在
位事無大小理無與知何有是歟因戲為詩
自愧虛名抗疏餘衰年况復迫懸車桑榆始得安身
計北闕從今休上書

其二

世人疑我發棠餘馮婦如今悔下車地坼天分渾不
管閉門終日讀吾書

鄭景任在獄一年忽有恩命携家南歸途中

見訪

拍拍鴻雁網翩翩鳥出籠過逢是遠別驚倒兩衰翁

聞韓益之浚謙申敬叔皆將遠竄丁巳

病裏聞吾友全家涉遠途教兒談細事且欲慰須臾
敬叔將赴謫所貽書乞詩

好去吾玄老臨行別有辭怡神如在室處困若逢時
道直屯猶泰心冥險亦夷天生此物意應不止於斯
順生娶妻新婦來見以綿布二箱為幣後聞婦
家以幣薄為咎戲成一絕

四十年朝士家徒四壁虛姻家白眼視新幣愧粗疎
春日過南子安舊居

梁燕尋巢喚主哀舊遊陳迹委蒿萊林塘只有花含笑
笑笑殺衰翁獨徃來

送李尚古聘日本

先師隘世網晚有乘桴想終軍少多氣思破萬里浪
空言竟何為終未脫塵鞅今君允蹈之此計亦云亢
我困在泥沙醢鷄喧甕盎常期汗漫遊引領勞心賞
歸來若遇盧敖生舉臂飛飛九天上

寄申敬叔

兩地俱為放逐臣中間消息各霑巾清平山下昭陽
水日夜西流到廣津

八月初九日中風戲成三絕

命矣斯人而有斯全歸無愧亦無悲子輿解道吾心
事造物將安以我為

其二

信命平生不解愁是身於世一虛舟思量六十年前
事欲說應須失笑休

其三

只有形中一箇神聚何緣果散何因無心出宙無心

卷天際閒雲是我身

讀史有感

長孺剛嚴曩情諧深嗟狂簡不知裁古人歷歷誰知我師友千秋宋子哀

朝起望見雲吉峯戲占

蒼狗白衣悲世變凝冰焦火見人心東天萬古長存者雲吉千尋挿水心

生日聚族小酌

賤降茲辰吉荒郊并二難徵歌如訪士度曲若循環羣玉盈庭喜清詩入座寒叙天倫樂事忘却在衡關

臘月二十二日有昌城之命初過忘憂嶺是

日甚寒

瘴風難透鐵心肝不怕西關萬疊山歇馬震巖千丈嶺夕陽回望穆陵寒

是日待命于青坡村再疊前韻

世事眼前同鼠肝高名身後重丘山此行未敢遺形累携得天涯一影寒

到青坡移配慶源又移三水正月九日改此青

李延陵好閑諸君携壺送于山壇道左

戊午

雲日蕭蕭晝晦微北風吹裂遠征衣遼東城郭應依

舊只恐令威去不歸

往心里瞻望都城有感

一出都門萬事灰舊遊陳迹首重回浮天好在終南
色佳氣葱籠紫翠堆

道上戲吟短語

能忍一時痛可做天下事隱默官京師不汗五日死
且莫疑畏此二柄古人已能優劣是

早發金城縣抱川諸姪等辭歸

達士遺天地如何意慘然非無一掬淚耻灑別離筵
始有三水之 命命改北青路踰鐵嶺喜而有

作

孤臣不度濟人關日月昭昭宇宙寬青海怒聲風氣
勢白山孤影雪孱顏恩加沙塞水先泮心健關河路
不難唯有憶 君千里夢曉隨殘月趁朝班

不寐

世亂疎儒術時危忌大言不眠憂 社稷無力濟黎
元草草新年夢蕭蕭古驛軒家鄉已千里誰肯問寒
暄

二十一日宿安邊民家女友夜起啼甚悲云夢
見權姊問道何事曰無一語遂悲惋成詩

少女夜中向壁啼自言夢見權家婦窓間寂默坐支
頤應念關山獨去父

口號

諸公衮衮登臺省匹馬關山我獨歸蘇武看羊北海
上絕無書鴈上林飛

德山驛

古驛荒涼雪壓籬僕夫相伴夜啼飢騷家情景嘗應
盡天遣詩豪發妙思

咸原驛

玄石山頭雪吹來驛路霜隨風迷大陸寒日淡無光

士人尹善道抗疏言事因竄六鎮道過洪原官
妓趙生佩壺來慰以此名聞洛下今適過此寄
宿其家不知主人為趙也翌日乃知戲吟一絕
曾於京口盛名傳萍水過逢亦偶然深愧叔譽非具
眼不知醜蔑在樽前

二月初六日到北青

古堠松牌記北青板橋西畔少人迎羣山定欲囚豪
傑回望千峯鎖去程

夜坐

終宵默坐筭歸程曉月窺人入戶明忽有孤鴻天外

過來時應自漢陽城

北俗喜馳馬男女皆羶笠執鞭而馳時有官妓
慶仙來見余余問汝亦能是乎仙即據鞍回旋
躍馬而走余喜而賦之

裊裊娉娉葳蕤長翩然輕燕踏龍翔女郎拾翠爭來
看隔水東風送異香

端午思先墓

忠孝傳家及此身爺孃常戒汝為人龍荒此日天連
海每聽林鳥哭令辰

白沙先生集卷之三

白沙先生集卷之四目錄

拾遺錄詩

題聖住寺

送南東岡 彥經 全州府尹行

應製次山海關主事馬維銘贈 宗系辨誣使

俞泓詩二首

贈張 維 崔 鳴吉 兩生

次金接伴寒食感懷韻

李從事次韻索和簡寄

次李從事韻

金接伴又用盈韻投贈次韻却寄

李從事賦二篇索和再次

次李從事演雅體

再次李從事

次金接伴韻

再次

玄風道中聞林間小閣讀書聲甚清亮因賦一

律

羅接伴將入釜營索詩

踏青日在遂安

韓方伯以遂安勲婢為囑至則一女乃韓舊所

眄戲占一絕却寄博粲

次沈尚書韻題李逵夫草堂

戲次月沙驢背韻

次海月駐蹕山有感韻

題梧里壽瑞軸

許留後潛挽

漢江泛舟次 天朝熊行人化韻

西湖泛舟又次熊 天使韻

賀申子方應槩慶壽宴

錄奉鶴洞兼憶守夢

夜坐

韓清川準挽

失題

夜坐

李叅議澗畔松

贈河慕軒渾

醉呈慕軒

贈別南叅奉樞

李正字者俊挽

次遊三聖山韻

完陽君李公忠元挽

白沙先生集卷之四

拾遺錄詩

題聖住寺

落魄鑿臺舊翰林來尋聖住寺
沉吟腰間寶劍僧驚見
喚作遊山李內禁

鑿臺一作蘭臺

送南東岡

彥經

全州府尹行

乙酉

完山却是三韓舊開府新
從百濟雄兩道元侯公獨
最一方柁軸此為衝恩加
南服謳歌暖威被秋天草
樹空治劇祇今須利器賤
生何惜別林宗

應製次山海關主事馬維銘贈

宗系辨誣使

俞泓詩戊子

璿系新歸正藩邦舊盡誠事應關數運功實賴經營
奉 奏衝殘雪宣 恩趁曉鶯 聖心翻倒極持以
報神明

其二

聖主光前孝行人奉使誠一心懸 魏闕重驛度遼
營書斷燕山鴈春回薊樹鶯歸朝頌 寶籙天日再
清明

贈張維雀鳴吉兩生

十丈澄潭雙鯉魚珠成領下異光舒煩君謹密休驚

動祇恐神功一日虛

次金接伴寒食感懷韻

殊方為客久滿面是風烟病憶君臣藥愁來子母錢
良辰悲屢度壯節懼虛捐掩淚思先墓松楸靜寂然
李從事次韻索和簡寄

金鱗擲網綠樽盈壓倒經年客意惇投刃未容肌雪
落登盤先已腹雷鳴薑新葱白饒涎下膾嫩羹香老
眼驚此興祇今應不淺風流孰似羨陂行

次李從事韻

春來公館怨孤棲一望家山夢亦迷無限客懷眠不

得曉庭風雨又淒淒

金接伴又用盈韻投贈次韻却寄

多君乘勝善持盈數日鞞兵貸獨惇忽有飛衝樓上
舞誰將鼓角坎中鳴兼程已訝從天下擣腋終看擊
地驚三箭會須歌競病一章能洗虎牙行

數日關然不賦今始

有寄故及之

李從事賦二篇索和再次

屢勝餘威戒滿盈輪臺汜可恤孤惇銜枚更欲收三
捷仰首今將試一鳴楚幕有烏知夜遁秦軍聞鶴愧
虛驚從來窮黷非真武擒縱功成振旅行

其二

篇章左右秩相盈兩敵誰憐我獨惇滕間楚齊常自
懼驚隨騏驥敢先鳴休將醜罵頻挺戰莫放虛彈更
落驚欲就巫咸問厄運丙申應忌月城行

前書歲言今年定是

厄會遭此困院云故末句及之

次李從事演雅體

願化鸞仙晚服椒九天笙鶴久寥寥鵬程浩浩頭邊
遠羊胛悠悠夢裏消坐負鹿門顏亦厚欲携鳩杖路
非遙誰將鷓鴣分黃白世味年來劇炙鴟

再次李從事

飮盤腥膾與醎鹽日對南烹意已廉呼兒數問花消
息東閣尋詩岸帽簷

其二

南路經年滿身累欲將疏滌付清溪剛腸輪轉平無
策那得具江去忿犀

次金接伴韻

佳句逢春始策功物華無處不繁豐新詩有味容三
上官酒無緣得一中老去青銅驚早白風歸綠葉看
危紅磨鈿問俗時相近靜裏情親是小童

再次

匏王受報又收功後嗣相傳極熾豐神馬拜叅金櫃
下處容來戲月明中曲傳憂息醇風遠舞罷黃昌義
血紅今日為來尋古事五陵無主樹童童

玄風道中聞林間小閣讀書聲甚清亮因賦一
律

萬竹林中草閣陰涼風吹送讀書音從容雲谷談經
興貞素清溪點易心壓倒五年戎馬氣喚醒千里旅
人襟征途久矣吾衰甚修攘他時望子深

羅接伴將入釜營索詩

強冠反唇哂豎儒公今起廢應時須凝持重若干鈞

弩妙運微如九曲珠萬里一身探虎穴百憂雙節佩
烏號東風默想鯨鬣動誰識中宵仰屋吁

踏青日在遂安

人事天時自萬般年年行李寄征鞍佳辰落莫逢場
少好會差池入手難俗儉未聞村作樂日斜惟見雨
連山終南舊迹吾能說拾翠馱紅倒帽還

韓方伯以遂安勲婢為囑至則一女乃韓舊所
眄戲占一絕却寄博粲

遼山老婦鬢如絲一別長吟團扇詞桑海舊盟今入
夢世情翻覆妾先知

次沈尚書韻題李達夫草堂

不欲可否事置身夷惠間幽棲同錦水逸迹異商顏
展席迎佳客開簾對好山丁寧留後約冠退我當還

戲次月沙驢背韻

戊戌朝
天時

珂馬風流不慣驢功名真骨有生初憑君莫作江村
夢合置耿耿大屋廬

次海月駐蹕山有感韻

山勢蜿蜒想躍龍石縫猶帶豎旗蹤可憐許大唐天
下只敵區區一蟻封

題梧里壽瑞軸

丙午

夏夜無眠晴月滿懷抱膝長吟不知樛棟已
出日矣朝來覺炎困益甚梧翁致書并附壽
瑞軸索和藉先大夫為言元集有參贊
公詩故云余廢
詩已六年矣立戒頗嚴到此不敢終遂初心
效拙還却寄

追攀手澤愴先人五十三年一夢春因感故家家世
事滿聽歌詠舊維新

許留後潛挽丁未

以不諱言俠中能高尚賢真同魯一變豈賴孟三遷
冰蘖由天得風標作地仙深蒙過獎拔祇恐負重泉

漢江泛舟次

天朝熊行人化韻巳酉

錦纜徐牽落日迴江干烟樹影枚枚東門縞兮真非
分垂隴歌吟愧不才風浪崩騰迎棹去雲山飛舞逐
人來賓榮殺却喪荒禮懷抱無緣得盡開

西湖泛舟又次熊

天使韻

誰向河源獨溯流星槎千里續真遊洪濤噬岸石孤
立積氣蒸空天遠浮急雨蔽山風入座歸潮吐嶼草
連洲仙峯在眼無多路逆浪何能到上頭

賀申子方

應標

慶壽宴乙卯

九十阿翁六十兒黃金橫帶舞傲傲世間此事應稀

有天祿 君恩兩善斯

其二

崗有時崩陵有時夷惟茲壽星並日垂輝猗歟德門
申錫遐齡寔天恩

其三

金環在鬢金帶橫腰父子拜舞祝 聖成謠猗歟魚
軒一家尊爵亦 君恩

其四

凡厥趾美必有承將是宜寅德允徯天昌樂哉無護
歲歲長歌阿爺恩

錄奉鶴洞蕪憶守夢

鄭公

謫客何曾出戶庭手栽梅竹已交青梅香繞樹風初
定竹影當階月正亭楚水楓林分去住槿籬茅屋傍
居停萊山老守顛狂甚乘醉來遊笑獨醒

夜坐

恤緯非嫠婦憂天類杞人不眠思 聖主無地置愚
臣歸路江深阻東華事故新悠然成一嘯耿耿至明
晨

韓清川準挽

餘事麒麟盛業光人看八尺畫軒昂官曹遇錯稱虞

器原隰留仁詠召棠廷尉遺風應有後蘭陵諸子孰
非良嗟余最是安昌客淚盡新銘哭後堂

失題

仙尉移書憶舊歡相期并馬入名山征途可惜吾衰
甚回首雲橫萬二巒

坐夜

外物日千變寂寥唯此心滔滔皆是夢一笑一回吟

李叅議澗畔松

憐汝遲遲澗畔生托根巖角水泠泠霜風雪月添缺
影清苦元來乃性情

贈河慕軒

渾

仰山仰水昔曾行楓葉秋來幾樹明寄語孤雲臺上
鶴入間猶有未歸情

醉呈慕軒

檻外千山色軒前萬竹聲莫嗔歸去晚到此見人情
贈別南叅奉樞

潦倒南叅奉憂危李政丞難為千里別共對五更燈

李正字

著俊挽

細柳當年拭眼望阿翁有子儘才良將軍命矣今西
塞正字胡為又北邙骨肉一天分異域存亡千里割

深腸傳家白羽凋零盡青海無聲月映霜

次遊三聖山韻

三年落魄屠肆間有興便欲尋名山餘事為文竊慕
子長遊收覽竒恢以自壯江南聞有三聖山後挹名
都前巨渤城中近相望雲表螺一角蟠根背江漢遠
勢橫宇宙仙靈以為窟麋鹿以為園伊余負笈渡江
遊是時新晴夏四月馭鞍初暢釋玉洞杖策仍登歡
喜臺仙兄躡飛鞚老我愧非蘇翁才相携入古寺寺
門遠對滄溟開因呼寺僧問三聖為名意甚麼云昔
鴻濛初幽怪亂揚簸夸娥巨靈未專功摧林蹶石奔

龍王天生三聖入次第來軒昂神功鎮茲山道力整
坤軸其害斯乃去萬靈始安宅諸天亦歡喜瑞氣縈
東西聽終辭絕神爽然入門頂禮獅子爐伽藍三座
今儼然夜叉羅刹中庭俱竒蹤千載與誰徵此事况
惚難稽古我來心賞最留情蓮花臺下多羅樹清陰
產涼碧四圍翠幕流雲晝長鎖西南望大溟雨景尤
竒晴亦可開簾俯遠野亦有桑柘村村烟詩材與畫
本把筆自覺來聯綿爾來三十二春秋過眼歲月隨
旋磨舊物山獨在當時緇髮應無多借問壁間題莓
苔剝落泥塵覆衰年舊遊病難追華門寥落空圭竇

時來起南望雲裏蒼然露數亩今觀汝妙年下手已
能工繅繡青蓮草堂兩部書奧語玄言分箇箇有意
續壯遊觸熱不憚朱炎威平生一蠟屐探幽選勝窮
巍巍應尋我語覓餘聲物色分留助汝起阿翁詩力
退有作少清吹兒乎務增光努力齒人數探天根躡
月窟泣鬼神驚風雨沾我席上珍造次慎墜失詩書
勉保乃家業門戶當看動光色人言谷深播蘭馨天
遠聞鶴唳顏何人也各則是不患不與前人齊辛勤
博學貴多蓄蓄極而通自灑落勿憂道體悠悠歲序
速但恐鵬程浩浩吾力弱茲行意非偶豈獨愛山深

決科又餘事亦不貴啁吟所願涵養玩吾心靈境不
受塵埃侵豈有無址得成岑亦如條暢由根滋吾言
雖耄惟聖謨世間三尺皆能知顧我力雖衰暮年意
感發男兒蓋棺前萬事猶未畢披榛勤覓路庶欲尋
真境眼膜得金篦髣髴見形影初味含蓼與嚼蠟遂
通柝縷而分毫從茲進進念九仞微塵倘可成山高
馳心慎勿求諸遠道在几案非帶嶠今人不見眼前
睫庭前栢樹元吾佛高車駟馬遵大路按轡徐行歸
故園老夫耄矣無能為戒汝入德由直門行乎勉之
哉青欲青於藍當吾拄杖倚門間政汝望雲棲禪龕

慈情豈欲遠相離為汝加功進脩了學問要當先本
源時時點檢靈臺曉澄澄夜氣好護持勿令茅塞泥
丸官邪思喜自暗中起此實亂世之姦雄痛徵前日
伎倆習夙恥從今期一雪人生墮地貴是男莫拋當
前間日月吾言指正路勇往不迴避臨行別有贈戒
之以六事戒爾既飽嬉終日行巡簷簷浪逐徒旅耽
山事觀瞻戒爾處朋遊常思進一步莊敬以接人勿
生妄喜怒戒爾開卷時得意便鼓舞再三披閱悟歸
趣油注瀾翻莫倉卒戒爾為學立乎大正誼明道如
江都須尋真正一條路恐墮俗學多岐谿戒爾持心

先立志直往擔當奮勇決志至然後氣次之萬事以
此為正案戒爾習靜兼攝養學業豈徒勤讀書隨時
將且好栽培榮衛環之毋若玦丁寧六戒慎付囑赤
手期捕深淵龍臨分割慈老人意出門嚮臂遊子情
回頭却憶舊遊處興入蒼山雲淡薄且聞同伴僧尚
餘干戈後為報三十年後平安竒深巖縮腰脊時時
引領奮欲飛悵望南雲為阿誰老來苦憶松醪飲早
晚尋僧一中之

完陽君李公

忠元挽

可惜完陽老銀鉤不復傳懸針 裕陵誌倚劒泮宮

然扁並世生何幸傷衰去忽先臨津夜裏語一憶一潛

白沙先生集卷之四

